


Un programa ta uni schoolnan y comercio di Aruba

E di tres fase di Kids Council a keda concretiza



ORANJESTAD (AAN): "MissingChapterFoundation" bao direccion di Su Altesa Real, Prinses Laurentien, hunto cu representante di UNICEF a introduci e di prome "chapter" di e programa cu ta uni schoolnan y comercio/turismo di Aruba.

Recientemente e di tres fase di Kids Council a keda concretisa na unda a bishita e schoolnan cu lo inicia den e pilot program pa entrega e certificado di participacion y a reuni cu e hoteleronan y tambe AHATA y ATA.

Despues cu na april a introduci e programa pa uni studentenan cu comercio, esta Turismo, a base di un programa creativo na unda ta forma un "Kids Council" cu ta consisti di hobennan cu ideanan fresco y dunando esaki un problema pa soluciona durante un periodo di 6 luna di tempo.

Den e di tres fase, diferente dilemanan lo worde presenta na e muchanan. E dilemanan a worde describi pa e diferente hotelnan. Colegio Arubano ta e prome school cu ta inicia e aña e council bao direccion di e dinamica Juffrouw Chikito de Veer.

Mientras cu Aruba Tourism Authority ta e prome compania cu a firma pa 3 aña pa Raad

van Kinderen.

La Cabana Beach Resort ta e prome partner cu a presenta un problematica na un "Consejo di Mucha" pa haya ideanan fresco pa cu su solucion. Gerente general di e hotel, Joe Najjar a splica cu La Cabana ta brinda sosten na cualkier iniciativa cu ta dirigi na stimula e mente y spirito di nos muchanan pa pensa tocante e retonan cu tin den nos sociedad.

La Cabana ta hopi contento di tin e oportunidad pa presenta e pregunta tocante "Healthy Lifestyles" y traha cu e hobennan y haya nan punto di bista "crystal creative" y intuitivo/creativo den un "framework" cu por hiba na costumernan y un bida mas saludabel pa nan asociadonan. E adaptacion di un Healthy Lifestyle lo no keda na e asociadonan so, como cu nan ta comparti nan costumernan y adaptacionnan cu nan famia y amigonan y pues lo tin un impacto ainda mas grandi cu e comunidad di e hotel so. E oficina di Kids Council lo ta ubica den Aruba Investment Bank. Gerente di AIB sr, Friendsel Giel ta sumamente orguyoso di por tabata cede di e prome reunion di Kids Council na Aruba na aña 2013, tempo cu Editorial Charuba a presenta e bukinan

na papiamento di Prinses Laurentien titula mr Finney". Na 2013 a cuminsa papia cu prinses Laurentien tocante establece un asina yama Kids Council aki tambe.

Awor cu hopi orguyo na 2016 Aruba Investment Bank tambe ta participa den e programa y lo conoce nan Kids Council. "Ta un placer pa tin e project coordinator Mirla Passchier hunto cu nos aki na AIB" Friendsel Giel a enfatisa. E kwartiermaker y iniciador di e proyecto, sra Alice van Romondt ta un bon conoci di AIB desde hopi aña y a realisa diferente proyecto hunto cu AIB tambe ariba tereno cultural.

Pa Aruba esaki ta un formula fantastico na unda ta trece e importancia di nos Turismo den klasnan cu ta bira parti di extra-curriculum y hunto ta yega na solucionnan y ideanan importante pa desaroyo di nos turismo. E voz di e hobennan lo conta!

Na Aruba companianan cu ta e "Founding Fathers" ta Divi Resorts, Renaissance Hotels, Amsterdam Manor, La Cabana Resorts y hunto cu Aruba Tourism Authority y AHATA lo yega na complementacion di e programa envolviendo hobennan entre 11 pa 14 aña di edad.